

INUIT ATAQATIGIIT INATSIARTUNI



UKA 2024/144

03.02.24.

Peter Olsen

Inuusuttut ilinniarfiini, inuussutissarsiutinut ilinniarfinni ilinniarfinnilu ingerlaqqiffiusuni ilinniartut karakterimik qaffassarnissaannut misilitseqqissinnaalersinniarlugit malittarisassiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Nivi Olsen, Demokraatit)

Oqaaseqaat:

Atuarfimmi ilinniaffinniluunniit assigiinngitsuni militsinnermi karakteri pitsaasoq sunaava aamma pitsaanngitsoq sunaava? Karakteri pitsaasoq, pitsaanngitsorluunniit qassiuva?

Assersuutigalugu ilinniartuuvunga; Angusarissaarumallungalu, eqiasuillunga ilinniagassakka suliaruaannarpakka aamma atuartuaannarlunga - sukataarujussuarpunga angusarissarusullunga.

Misilitsippunga. Misilitsikkamalu qaffasinnerpaap tullianik, tassalu 10-mik karakterinnappunga. Uffalu kissaatiginerpaagaluarlugu angorusunnerpaagaluarlugulu qaffasinnerpaamik, tassalu 12-mik karakterinnakkusukkaluarlunga. Ajourivara. Ajuallappunga pikkunaatsoorujussuarlungalu, tassami angorusunnerpaasara 12 angunngitsoorakku. Isumaqarpungami karakteri 10 pitsaasuunngitsoq. Pitsaasutuarlu tassaasoq karakteri 12.

Illuatungaani, ikinngutiginerpaasara misilitsikkami 8-mik karakterinnappoq. 8-mik karakterinnakkami nuannaarujussuarluni pissittaartuinnaavoq, tassami isumaqarsimagaluarami annerpaamik 7-mik karakterinnassalluni, imaluunniit allaat angusinnitsoornissaminik ernumasimagaluarami. Taamaamat 8-mik karakterilerneqarami nuannaarujussuarpoq oqiliallarujussuarlunilu. Tassami aamma ilinniarnermi naammassivoq angusillunilu. Ingerlariaqqissinnaanngorlunilu.

Tassa taanna kissaatiginerpaasa ilinniarnernimik angusisinissani, ingerlariaqqinnissanilu. Angorusutani anguaa. Naak ikinngutiminit angusani minnerulaarualartoq karakterini akueraa aamma naammagisimaara. Karakterini pitsaasutut nalilerpaa.

Illuatungaani ikinngutaata karakterini 10 naammaginngilaa, pitsaasutullu isiginagu akuerinngilaa. Tassami kissaatiginerpaagaluarpaa 12-mik karaktereqassalluni. 10 pitsaasutut isiginngilaa, naak angusimasani tunngavigalugu aamma ingerlariaqqissinnaanngoraluarluni.

Taamaattumik qulaani assersuutit marluk tunngavigalugit, karakteri pitsaasoq pitsaanngitsorluunniit sunaanersoq akiuminaatsinneqarsinnaavq. Assersuutiginnugit marluk, qulaani pineqartut takutiinnarpaa, karakteri pitsaasoq pitsaanngitsorluunniit, inummiit inummut assigiinngitsumik

nalilersorneqarsinnaasoq. Taamaattorli karakteri angusinnngitsuuttusaasoq karakteritut pitsaanngitsuusutut tamatta isumaqatigiissutigisisnaagunarparput.

Nivi Olsenip tunngavilersuummini oqaariartuutai imaattut isumaqatigaavut:

“Misilitsinneq amerlasuunut artornartarpoq. Karakterilunnerlu tamatigut piareersarluarsimannginermik piginnaasakinnermilluunniit tamatigut peqquteqarneq ajorpoq. Karakterilunneq pissuteqarsinnaavoq aamma soorlu annilaanganermik ajutoornermilluunniit. Ullumikkut malittarisassat imaapput, angusinnngittooraanni, misilitseqqinnissaq periarfissaalluni. Taamaapportaaq, napparsimaleraanni imaluunniit takkutinngittuuissimagaanni. Akerlianilli misilitseqqittoqarsinnaanngilaq, angusisimagaanni pitsaanngitsunik karakteereqarluni.”

Nivi Olsenip siunnersutaa pissanganarlunilu soqutiginaraluarpoq, kisianni peqqissaartumik tamanna eqqartorluagassaavoq. Isumaq immiini nammineq ajunngikkaluarpoq karakterit qaffassarsinnaajumallugit misilitseqqissinnaanermik periarfissalersinnaaneq.

Kisianni soorlu aallarniuteqarninni, assersuutinillu marlunnik assersuuteqarnikkut apeqquusiisunga; Karakteri pitsaaanngitsoq qassiugami. Karakteri 10 narrugiinnarlugu 12 anguniaannarlugu misilitseqqittaqaattarsinnaavunga? Naamik, Inuit Ataqtigiinniit taamatut isumaqanngilagut.

Tamaattumik taamatut naatsumik oqaaseqarlunga oqaluuserisassaq una itigartipparput aamma isumaqaratta pisariaqanngitsoq periarfissaasinnaasunik allanik misissuisoqarnissaa.

Qujanaq

Peter Olsen

Inuit Ataqtigiit